

請 旨補授下等各官由督練各督撫咨明練兵處會同兵部彙案具奏惟同正參領不得仿城守尉例跪 安遞摺 十六同正參領以下各官由學堂出身暨文職改用者准補實官此外祇准加銜其餘體制一切與軍官相仿如在營年久積有資勞者可酌增俸餉以資鼓勵 以上各條爲現行章程如有應行損益變通之處仍由臣處隨時考核會同兵部具奏請 旨遵行

成都將軍綽四川總督錫會奏提臣親率諸軍進克巴塘勘平邊亂並前後攻奪關隘

搜勦逋竄情形摺

竊查本年二三月間巴塘喇嘛造言煽亂使番匪糾衆生事戕害駐藏幫辦大臣鳳全等並殺斃法國教士土司又復助逆以致全臺變動邊境騷然奴才先因鑪邊迭有事端 奏派提臣馬維騏躬率所部赴鑪至是遵 旨遴委建昌道趙爾豐添募勇營會同勘辦惟用兵關外首慮饋餉行阻尤慮蠻荒響應特委道員文緯督理糧運夫騾缺乏百計經營而宣諭之員履險於瞻桑番寨之中順逆漸明始得解其附結布置粗定馬維騏趙爾豐乃能振旅西征後先馳抵裏塘維時巴塘喇嘛土司等誓衆祭旗出而抵禦節節關隘拒險設伏圮橋掘塹拒我師徒焉維騏以爲殄寇必貴速也亟於六月十一二三日親率五營次第開拔

分道並進十八日師次二郎灣其山後頭殿喇嘛寺地勢高峻已有悍匪嘯聚意圖橫襲我軍馬維騏先派中營黃啓文馬德昌帶隊往攻礮石雨下我軍張炳奎等受傷次日馬維騏親往應援搏戰軍士攀木蹂升而上斃匪數十名陣斬首要喀珠大哇惻忍吉村三名而且珠等二名亦屬魁酋並爲槍斃餘匪始各逃散奪獲槍械並有開墾官物在內是日後營馬汝賢右營李克昌靖邊營張鴻聲會師於雲南橋逼匪漸卻甫至三壩關諸營合圍兜擊勇氣百倍酣戰兩時之久陣斬逆目日根彭錯喇嘛因勾夾伙等四名遂奪其關二十日副中營馬德又在喇嘛了突遇賊隊三百騎刼取官糧該營奪其精銳以敗之於是羣匪皆退據大所關併力遏守關本石壁峭峙盛暑猶積冰雪當恐仰攻不易密遣馬德暨幫帶汪定邦馬榮魁等繞道六十里以拊其背馬榮魁於二十三日丑刻途遇匪糧奪獲糈糶八馱是日午刻諸營前後夾擊匪等擁衆撲犯把總陳天恩等連發巨礮衝分中道因各突馳而上克取雄關要逆喇嘛工布汪阿那等俱殲焉是役也斃匪數百名我軍亦有傷亡由此迭破要隘直搗奔察木二十四日各營克復巴塘喇嘛本謁丁林寺爲巢穴及是勢不能支舉火自燔飭衆渡河拆橋而遁我軍追逐江干槍斃淹斃者百餘名二十六日馬維騏抵臺詰究倡亂本末安撫被難商民解散脅從分別良莠立將正土司羅進寶副土司郭宗札保一併從

嚴拘禁查知戕害鳳全之喇嘛阿澤番匪隆木郎寺並寺中堪布壩哥未格以及稔惡最著之阿江及格桑洛朱阿松格斗等尤多竄逸且肇亂之由原因溝內七村之番燒毀墾場而起該番現猶散伏象山一帶若不痛加懲創將虞灰燼復然馬維騏分派營員帶隊四出期於翦巨慝而清餘孽七月初三日至初十日馬汝賢搜匪於毛奶西生擒格桑洛朱羅戎却本二名惟林菁深嚮馬汝賢遇伏受傷甚重裹創以返而張鴻聲則於三岔路擒獲阿江李克昌則於象山生擒澤昌汪學馬德則於阿西嗎呢熱山生擒阿澤與汪定邦賈廷貴等均多斬馘各營搜勦殆徧日有俘獲共奪繳九子槍七十餘桿並在阿澤身旁搜獲鳳全頂珠翎管澤昌汪學身旁亦有殉難各員衣具又在土司處清獲教堂銀物兩司鐸屍骸均經尋獲辨視無誤主教倪德隆單開最要之匪珍休硬不又往鹽並調兵打毀教堂之喇嘛格桑吉村先後弋致其有擒到各匪孰爲凶逆悉經當時目擊之委員吳錫珍等指認的確旋獲木郎吉供認槍中鳳全腦後不諱而阿松格斗等亦多就獲經此懲創以後蕩滌瑕穢遐荒震驚人心胥安全臺底定迭據提臣文電咨報前來奴才等已將要略電陳仰紓 宸念一面復致提臣等迅提該正副土司暨擒獲匪犯各予駢戮用以舒中外之憤該臺善後諸務暨應勦捕匪即飭趙爾豐統兵留駐詳加審度妥籌辦理俾可一勞永逸無虞捍格馬維

軍事

二十

正月

騏酌留所部餘當凱撤回省稍休勞瘁藉省饋運伏查鳳全遵 旨籌辦邊務雖欲振興屯墾亦未嘗以峻急行之祇因擬請限制寺僧人數一疏喇嘛聞知中懷怨懟飛誣搆謗鼓惑愚頑正副土司初不過潛預逆謀繼則公然助惡屢投印文於奴才等署竟稱鳳全教練洋操袒庇洋人應即加之誅戮若川省派兵壓境惟有糾合臺衆聯聚邊番以死抗拒等語狂悖實爲至極該僧土驕橫自大固屬匪伊朝夕然使臣暫駐事有拂其志欲輒敢蓄謀慘害自乾隆十五年前藏朱爾墨特之變至今百餘年誠西陲所未見且鳳全從死百餘人之衆兩司鐸又罹其厄焚毀教堂糧署厥匪皆不容誅揆其狼性野心以爲憑險可以負隅結援可以召黨軍行倍苦兵食難支因而藐視 王師遂致始終怙惡詎知提臣等深愧醜虜不滅則藏衛道梗邊事將不堪問故馬維騏毅然以前敵自任趙爾豐提兵繼進力籌策應更保其後路無憂尤難者當毛了土司烏拉失誤之時中道絕糧士多餒色馬維騏拊慰之下忍飢奮起轉戰而前蓋由馬維騏將略夙優治軍最得士心臨陣乃能用命現在殲平邊亂論功行賞應求 特沛殊施甄敘優加共昭勸勵其餘異常出力文武暨陣亡勇弁容俟提臣等咨報到日再行核明彙案分請獎卹謹 奏奉 硃批另有旨欽此

各省軍事紀要